

# FURÚMIÑETU LIGÁRADAN PÁBLO LUN TIMOTÉO

## *Labürüjan Páblo lun Timotéo*

<sup>1</sup> Áu Páblo, láni Jesucrístu apóstolu áu, noúnajoún láu lugúmadin Búngiu le Wasálbaragüle lúma Wabúreme Jesucrístu, le uágubei wemenigida lun webélurun siélun. <sup>2</sup> Nabürüjañoun gárada to bun, Timotéo, niraü le tímatimaati lídan wafíñen luágu Jesucrístu. Resíbibeí abíniruni, gudémejabu lúma darángilaü lúmagiñe Wáguchi Búngiu lúma lúmagiñe Jesucrístu le Wabúreme.

## *Ewéridijani lueí arúfudajani le maríchabei*

<sup>3</sup> Queí meja nayúmuragun bun dán meja le nídinbei Macedónia, reídeimemebá ubúругu Éfeso lun baríñagun joun ítaga gürígia lun marúfudajan jamá cátei le maríchabei, <sup>4</sup> meténi jagíame lún buri úraga le magúmuchaditi jawágu jenébaanfaangu binádu mútu. Cátei buri le, barürügüti sigénei le málati, ani míderagun lumútiña gürígia lun jesériwiduni Búngiu láu jafíñerun luágu.

<sup>5</sup> Le lúnbei barúfudajani joun afíñetiña jagía, lun jínsiñegua jamá jámagua lugúndun jarúmaaru tan janígi, míchujali jarítangun dúru jawágu, áni buídujali jafíñerun. <sup>6</sup> Añájein, adíreirutíña lueí buri cátei le, ába jíchaagun joúngua lídoun buri sigénei málati. <sup>7</sup> Buséntíña buri lun arúfudajatiña jamá lídan lúrudu le líchugubei Búngiu lun Moisés, úati

gunfaráanda jamáni ni le guánarügü jaríñagubei ni le jarúfudajabei luágu lúrudu ligía láu sarágu afíñeni.

<sup>8</sup> Subúdi wamúti luágu buídu lan lúrudu, yúsuwarügaali ligía quei lubúdubu. <sup>9</sup> Lúnti lasúbudirúniwa luágu máma lan joun ja adügübalin le buídubei ladügüwa lúrudu, lúrudu jóunti ja wuríbabaña, ja magáambadibaña, ja mebéresenbabaña láu Búngiu, ja gafígounbabaña, ja minébenbei Búngiu lúma cátei lánina Búngiu joun, ja áfaruti jáguchi o jáguchu jilágubei, joun sun ja gáfarajadibaña, <sup>10</sup> joun ja agámaridubaña mamárieidunga o ja agámaridubaña wügüriña jáledigu, joun ja íwerujabaña güriña, joun ja yéebaña, jáma ja afíñurubaña luágu iyéeni. Jóunti gíñe sun ja adügübaña ámu cátei múaradunti láu arúfudajani jarúmati. <sup>11</sup> Arúfudajani jarúmati le, úarati láu ugánu buíti luáguti asálbaruni le loúnajabadina Búngiu, le weírigubei, le fuleísei láalibei güriña, apúrichija.

### *Eteíngiruni luágu lugúdemejabu Búngiu*

<sup>12</sup> Teínqui numúti Wabúreme Jesucrístu, le íchugubei ubáfu nun lun wadágimanu le, luágu lanügünina queísi ában wügüri derégüdaguati, lúma luágu líchugunina lun nesériwidun lun.

<sup>13</sup> Adüga láali sun cátei lé buri nun láu sún meja anábagua náni, eíbaaja numútiña meja ja afálarubalin, adüga numúti meja sun le nuáraati lun nagúmuchaguagüdüni jafíñen. Ába gudéme nan lun Búngiu lugúndun mámagidina meja afíñeti luágu Jesucrístu áni íbídiñeti meja nun ca lan nadügübei.

<sup>14</sup> Ligía luweírinbei nasánderuni labínirunina Búngiu, úara lúma afíñeni lúma ínsiñejabuni le

gíñe wawágubei luágu lídaañadiwa lan ában lúma Jesucrístu.

<sup>15</sup> Inárüni cátei le, le tímatimaati, áni lúnti jafíñerun súngubei luágu inárüni lan. luágu “liábin lan Jesucrístu ubouágun lun lasálbaruniña gaffígountiña”, áu furúmiñeti jádaangiñe. <sup>16</sup> Ligía nagúdemedunbei lun Búngiu lun gayáraabei lan larúfuduni Crístu sun lugúraasun nuágu, áu le furúmiñebei jádan gaffígountiña. Ítara líña niábin lun ábanbadina lan jémpulu joun ja lúnbaña jafíñerun luágu, lun jabíjini ibágari magúmchaditi. <sup>17</sup> ¡Ligía rúwama lubei uweíriguni lúma inébesi lun Búngiu le Warúeitebei lun sun dan, súnwandan, le mouwedadibei, siñá ligía larijiniwa, le Búngiu le ábanrügüti, le sábiu! Ítaralá.

<sup>18</sup> Timotéo, niraü, rúnumuti gumádi le bun lun bageíndaguni luwúribun Búngiu buídu, queí meja lariñaguni Búngiu jayúmulugugiñe wadújeñu lueígiñe Jesucrístu bun, ragüñubei inárüni lánina asálbaruni, adügeina le basúbudirubei luágu richá lan. <sup>19</sup> Añájein gürígia, féridi jamúti jafíñen ladüga madügün jamá gásu láu le jasúbudirubei luágu richá lan. <sup>20</sup> Ítara líña lasúseredun lun Himenéo lúma Alejandro ja nedéregerubaña lun Máfia lun jafúnrendeirun lun manábagun jamáni Búngiu.

## 2

### *Arúfudajani libügürü ayúmuraguni lun Búngiu*

<sup>1</sup> Furúmiñeti cátei, amúriajatina lun ladügüniwa ayúmuraguni lun Búngiu jawágu sun gürígia. <sup>2</sup> Lúnti wayúmuragun jawágu gumádimatiña, lúma jawágu sun lúrudugu lun gayára lan wabágaridun ában

ibágari darángilati, le derégewati lun Búngiu, le gíñe inébewati lídan sun luwúyeri. <sup>3</sup> Buíti cátei le, gúndaati gíñe Búngiu le Wasálbaragüle láu, <sup>4</sup> le busénbei lun jasálbarun sun gürígia, lun gíñe jayábin lun jasúbudiruni inárüni lánina wasálbarun. <sup>5</sup> Ában rügüñein Búngiu, ában rügüñein gíñe gayára ladímurejan waweígíñe ligíbugíñe Búngiu, wügüri le Jesucrístubei. <sup>6</sup> Derégeguati Jesucrístu lúngua lun loúnwen lun lafáyeiruni lebégi jasálbarun sun gürígia, ában lasúbudirawagüdün cátei le lídan lidáni. <sup>7</sup> Lun cátei le, loúnajana Búngiu lun narúfudajan joun ja mámabaña juríu libügürü inárüni le, lun gayára lan jafñerun luágu Crístu queísi Jasálbaragüle. Áu, queísi ában afñeti luágu Crístu, inárüni nariñagubei, mayéejatina.

<sup>8</sup> Ligía nabúseerúnbei lun jayúmuragun wügüríña lídan sun fulásu, iñúrañu jájabu láu tarúman anígi, úouga igáñi ni asígenejani jádan jáma jíbiri gürígia lídan le jayúmuragun lun Búngiu. <sup>9</sup> Manárimelá tuwéndegun jadáuragun würíña, lun máma lan láu amúriguni janárimeguti jaráanseragua jóungua, ni láu gólu, pérlas, o daüguaü séruburitu, <sup>10</sup> lun láu lan lubuídun igáburi jadáuragua jóungua quei lúnti lan jadügün würíña ja derégeguañabaña jóungua lun Búngiu. <sup>11</sup> Lúnti maní jamá würíña dan le larúfudajoúniwa joun, lúnti jerésibiruni arúfudajani ligía láu ában ünabuni. <sup>12</sup> Májatina lun tarúfudajan würi lídan jadámurin afñetiña, ni lun tagúmadiruni würi wügüri, lúnti teréderun maníñu. <sup>13</sup> Lugúndun Adán ladügübei Búngiu furúmiñe, lárigiñe, ladügoun Éva. <sup>14</sup> Máma gíñe Adán leyéedubei Máfia, würi ayeedúaboun, áni láu

tayeedúniwa, ába táburujan lídoun figou. <sup>15</sup> Láu sun líra, jasálbaruba würiña láu jagúnfulirun láu le lúnbei jagúnfuliruni queísi úguchuru, ánjein ítara méme jafíñerun luágu Crístu, arúfuda jagía ísiñejabuni lúma arúmani láu igáburi buíti.

### 3

#### *Ligáburi ída lúba lan jouuserun fádirigu*

<sup>1</sup> Inárüni cátei le. Ánjein abúseera ában gürígia lun fádiribei lan, ában wadágimanu buíti labúseerúbei ladügün. <sup>2</sup> Lun fádiribei lan ában gürígia, lúnti labágaridun ában ibágari le míchuti lúgaaru lun ladeinjouniwa lun. Lúnti túmari lan ábanrügü würi, lúnti gíñe lanügün ában ibágari sériuti, buíti lichügü, inébewa. Lúnti aráanseñu lan sun dan lun lerésibirun bisída lúbiñe, lúnti buídu lan larúfudajan, <sup>3</sup> moún lumuti gátadi lan, manígi wuríbu, mabúseerun ligíame seínsu le marúmaanti lagáñeirúniwa. Lubáragiñe líra, lúnti areída lan, dilí ligíame, manígi ligíame seínsu. <sup>4</sup> Lúnti gayára lániña tílana lúban agúmadira buídu, lun gíñe ladügün lun gagáambadi jamá lirájüñü, inébejabu. <sup>5</sup> Lugúndun ánjein magúmadirun lubáliña wügüri tílana lúban, ¿ída lubági gayára lan laríjin jáu tílana lilígilisin Búngiu? <sup>6</sup> Moún lumuti lubeíti fádiri lan ában iséri afíñeruti lueí lanáangun lúngua sarágu luágu lubára, ábame láburujan lábugiñoun íñarawaguni le gádaanbalin Máfia. <sup>7</sup> Lúnti buídu lan ligáburi, lúnti gíñe inébe lan joun ja mafíñebaña lueí ladímurejoún wuríba luágu, ábame láburujan tídoun lisádarán Máfia lun lagünrinchawagúniwa lubuídun líri.

*Ligáburí ída lúba lan jóuserun ja esériwidubaña ligílisirugu*

<sup>8</sup> Ja gíñe esériwidubaña ligílisirugu lúnti wügüríña jamá ja inébewatiña, lúnti jagúnfulirun láu jererun, moún lumuti jabácharuadun, ni lun línsiñedun seínsu joun. <sup>9</sup> Lúnti járúgüdüni inárüni lánina afíñeni le arúfuda láalibeí Búngiu woun, buídu, lun gíñe jarúma tan janígi. <sup>10</sup> Lúnti jouchún, lárigiñeme, ánjein úa lubeí mégeiti luágu lubuídun jagáburí, ligíaba gayára lan jesériwidun ligílisirugu. <sup>11</sup> Würíña ja esériwidubaña ligílisirugu, lúnti gíñe inébewa jamá, moún lumuti marásualugu jamá, lúnti sériu jamá, derégüda lídan sun cátei. <sup>12</sup> Ában esériwiduti ligílisirugu, lúnti túmari lan ábanrügü würi, lúnti gíñe lagúmadiruniña lirájüñü buídu jáu sun títana lúban. <sup>13</sup> Lugúndun esériwidutiña ligílisirugu ja adügübalin jawádigimari buídu, buídubei ladímurejóuniwa jawágu, áni ragütimaatiña anígi lun jadímurejan luágu jafíñen luágu Jesucrístu.

<sup>14</sup> Agúrabatina nídin aríjabu madíse, <sup>15</sup> nabürüjaní buri cátei le bun lun ánjana lan adárasaragua, lun subúdi báni ída líña lan lun loúserun gürígia jádan lufámilian Búngiu, to liligílisinboun Búngiu le wínwanbei lun sun dan. Liligílisin Búngiu ágüdajabalin linárün, toúnigiteí inárüni ligía buídu. <sup>16</sup> Siñáti lasígenerúniwa luágu weírigu lan Wasálbaragüle Jesucrístu, le subúdigüda láalibeí woun.

Arúfudaguati Búngiu lúngua queísi gürígia lídan Jesucrístu,  
arúfudaleí Sífiri Sándu luágu úaragua lan Jesucrístu.  
Aríja jameí ánjeligu.  
Apúrichijóuati luágu joun lílana sun fulásu,

afíñewa luágu lídan sun fulásu,  
resíbiwa ligía siélu.

## 4

### *Ja lúnbaña jígiruni jafíñen*

<sup>1</sup> Furáanguti lariñaguni Sífiri Sándu luágu lídoun lánme lagúmujoún dan, añájeinbaña lan gürígia ígiruti jafíñen luágu Crístu, jafálarame espíritugu ja ayéejatiña lúma arúfudajani le jámagiñeti máfianu. <sup>2</sup> Jagáambajaba arúfudajani jámagiñe gürígia biángua tigíbu, yéetiña, ja masándirunbaña ni cáta tídan janígi camá jamuga churáwaaru láu ában gürábu sùti. <sup>3</sup> Gürígia jagía, aríñagatiña luágu mabuídun lan lun jagámaridun gürígia, aríñaga jagía luágu níjein lan eigini moún lumuti leigin, láu sun ladüga lan Búngiu eigini buri ligía lun jeígini ja afíñebaña jáma ja subúdibalin inárüni, láu ateíngiruni lun Búngiu luágu. <sup>4</sup> Sun cátei le ladügübei Búngiu buíti, moún lumuti wamájarun lun ni cáta lídaangiñe, lúnti wánjarun lun sun le adüga láalibei, teínqui wameíme luágu. <sup>5</sup> Lugúndun láu wamúriajan lúma Búngiu lun labíniruni sun weígin, ñübinti lun labuídurun láu lerérun, lúma láu wayúmuragun lun luágu.

### *Ában esériwiduti buíti lun Jesucrístu*

<sup>6</sup> Ánjein barúfudaja cátei le joun wadújeñu lueígiñe Jesucrístu, ábanbadibu esériwiduti buíti lun Jesucrístu, áni tágüdajoúba buwáni láu buri dimúrei le lánina wafíñen, lúma arúfudajani buíti le falábaalíbei. <sup>7</sup> Meféridirabeí bidáani asígeneja luágu buri libídiegun úraga le ni cátati ligíbugiñe Búngiu, lubáragiñe líra, áfaaguabá lun bagúnfulirun

lúma Búngiu. <sup>8</sup> Láu sun ju lan lánjingichún úgubu, jútimaati bánjingichagun búngua lídan bagúnfulirun lúma Búngiu, lugúndun barúti cátei buíti woun lídan ibágari le lúma lídan ibágari le lúnbei wabíjini. <sup>9</sup> Inárüni cátei le, áni lúnti jafíñerun súngubei luágu. <sup>10</sup> Ligía lébubei wawádigimaridun, súfuri wagía anabúni, lugúndun rúwamaali lan weménigi luágu Búngiu le wínwanbei, le aráansejaalibeí asálbaruni joun sun gürígia, áni ja afíñebaña luágu, jerésibirubei asálbaruni ligía.

<sup>11</sup> Ligía buri cátei lúnbei barúfudajani lun jagúnfulirun gürígia láu. <sup>12</sup> Sériulá bigáburi lun manügüniwa ban quei ni cáta lueígiñe ñúraügidibu lan, lubáragiñe líra, lúnti ában ban jémpulu buíti joun ja afíñebaña, lídan ligáburi badímurejan lúma bouuserun, lídan ínsiñejabuni, lídan bafíñen luágu Búngiu, lúma lídan larúma bibágari. <sup>13</sup> Rúguabá búngua lun balíjanun Lerérun Búngiu lun adámurini, íchiga gurásu joun wadújeñu lídan jafálaruni, arúfudaja joun daríme lun nachülürün. <sup>14</sup> Yúsubeí ubáfu le líchugubei Búngiu bun dán meja le jíchugunbalin tábutigu ligílisi jájabu bábulugu, adímurejeina jagía dimúrei lúmagiñe Búngiu bun.

<sup>15</sup> Derégeguabá búngua lún buri cátei le, lun gayára lan larijiniwa bawáanserun lídan cátei láni Búngiu. <sup>16</sup> Góuniguabá búngua, lúma láu le barúfudajabei, ítaramemebá derégüdagu lídan sun cátei. Ánjein badüga ítara, basálbaruba, sálba jagíame gíñe ja agáambubalibu.

## 5

*Ída lúba lan ligáburi louuserun Timotéo jáma*



*afiñetiña*

<sup>1</sup> Madeínjabá lun ában weíriei mútu, lubáragiñe líra, adímurejabá lun camá jamuga lun búguchi, oúsera báñame wügüríña ñübürigiña queísi bamúlenu. <sup>2</sup> Oúsera báña weíyaaña würíña quei bouserunun búguchu, oúsera báñame würíña irájüñü quei bítunu, láu lubuídun arítaguni.

<sup>3</sup> Íderagua báña würíña ja jiláañabaña úmari, ja arijúabei luágu mégei jamá iderúni. <sup>4</sup> Ánjein garájüñü tubei ában würi to jiláli túmari, gabáña tugúya, lúnti jafúnrendeirun irájüñü jagía lun jeténirun furúmiñe lun le jemégeirubei jafámilian lúma lun jáguyugüdüni ínsiñejabuni le jadúweirubei joun jagübürigu, lugúndun buíti cátei le, gúndaati giñe Búngiu láu. <sup>5</sup> Würi to jiláli túmari, to eréderuboun tábugua le tímatimaati, rútmuti teménigi luágu Búngiu, merédeti giñe tayúmuragun lun Búngiu áriebu, wéyuagu. <sup>6</sup> Ánjounti to edéregeraguboun túngua lun ugúndani lánina ubou le, jiláñu tíña lun cátei lánina Búngiu láu sun wíngwiru lan. <sup>7</sup> Aríñagabei buri giñe cátei le joun, úa lámuga ni cáta lun ladeinjoún joun luágu. <sup>8</sup> Le marítagunti jawágu lánigu, játima lidújeñu, magúnfulinjali lúma lafiñen, wuríbatimáatiti sügü láu ában güriña le mafiñeti.

<sup>9</sup> Lun labürüdüniwa tíri würi to jiláalibei túmari tídan gárada lánina íderawagúni, to rügúboun níjeinjali lúmagiñe ürüwa-wein irúmu táu, lun giñe ábanrügügili lán meja túmari. <sup>10</sup> Lúnti tasúbudirúniwa luágu buíti le tadügübei quei buri jamúga ánjein meja agüriaja tubáliña tirájüñü buídu, ánjein buídu lubei touserun jáma

ja achülürübaña túbiñe, ánjein seríwi tubáliña idújeñu lueígiñe Crístu manáangunga túngua, ánjein íderagua tubáliña ja asúfurirubaña, o ánjein adüga tubeí furúmieguarügü ámu cátei buíti.

<sup>11</sup> Würíña ja jiláaña úmari ja ñübürigiña, mabürüdabeí jíri tídan gárada, lugúndun lachülürüba dan lúnya jabúseerun jámari. Ábameti jígiruni jesériwidun lun Búngiu ligílisirugu lúnya jamárieidun.

<sup>12</sup> Ábameti jadímurejan gürígia jawágu ladüga jadúraaguni jadáradun lúma Búngiu le lánina jesériwidun lúnrügü súnwandan.

<sup>13</sup> Ába jayábin lun jamágualigudun, mámarügü jamágualigudun, ába gíñe marásualugu jamá, eméteja lídoun sun cátei, adímureja cátei le moún lumuti. <sup>14</sup> Ligía nabúseerúnbei lun jamárieidunya ja ñübürigiñabaña, lun garájüñü jamá, lun jóunigirunun jában, lun míchugun jamá lúgaaru joun ja mafíñebaña lun jadímurejan wuríba jawágu. <sup>15</sup> Añájein würíña, ígira jamáli Búngiu, ába jafálaruni Máfia.

<sup>16</sup> Ánjein añájein jabeí würíña ja jiláalibeí jámari jádan lufámilian ában afíñeti würi o wügüri, lúnti líderaguniña, mígirun ligíame lun ában jamá ijürügu tun ligílisi, ítara lúba gayára lan jíderaguniña títana ligílisi würíña ja busénbaña jíderawagún.

<sup>17</sup> Fádirigu ja lábugiñeñounboun jaríaajan ligílisi, ja adügübalin jawádigimari buídu, lúnti inébewa jamá sarágu, játima gafísiutebalin apúrichijani lúma arúfudajani. <sup>18</sup> Taríñajare Lerérun Búngiu. “Magüragua jumeí liyúma jilügün bágasu le lánina wadágimanu lueí lásiñerun leígin lídaangiñe tubúñe fulúwaaru le uágubei ladügüragua lun lagídaruni

túra.” Aríñagatu gíñe. “Garíchatí ñadágimeinti lun libíjin lafáyeiruaja.”

<sup>19</sup> Madügabá gásu luágu líchugún lidúnrun ában fádiri ánjein úa jabeí biáma o úrüwa lun jíchugun fe luágu lidúnrun. <sup>20</sup> Ánjaña ja asígirubaña lídan figoú, lúnti badeínjan joun jagíbugiñe sun afiñetiña lun janúfudedun súngubei lueí jafígounjan.

<sup>21</sup> Ayúmuraguatina bun ligíbugiñe Búngiu lúma Wabúreme Jesucrístu, lúma jagíbugiñe ánjeligu ja lanúadirubaña, lun bagúnfulirun lúma buri gumádi le, lun ában lan láu janügúniwa sun gürígia. <sup>22</sup> Míchigabádügabá gásu luágu líchugún lidúnrun ában fádiri ánjein úa jabeí biáma o úrüwa lun jíchugun fe luágu lidá ni ában queísi fádiri tidan ligílisi lídan loúfudagun, lúnti batúriajani ligáburu buídu lueídügü gafígoun lan, larijwameti camá gúndaatibu láu lifígoun. Dísebá lueí sun le wuríbabei.

<sup>23</sup> Quei súnwandan lan gári lan burágeirugu, mátabá dúnarügü, gurába gíñe murúsun diweín.

<sup>24</sup> Lídan le báluajaniña wügüriña lun jesériwiduni Búngiu ligílisirugu, jarítaguabá luágu añájein lan gürígia arijúati jafígoun furáangu lubáragiñe jagúserun, añájein gíñe, marijinti jafígoun darí lárigiñe. <sup>25</sup> Ítara méme líña gíñe, cátei buíti le jadügübei gürígia, arijúati furáangu, áni íbini marijín lan, siñáti leréderun arámudagu lun sun dan.

## 6

<sup>1</sup> Afiñetiña ja músubaña, lúnti weíri lan jinében jayúbudirigu joun, lun madímurejoún lan wuríba luágu líri Búngiu, ni luágu cátei le warúfudajabei.

<sup>2</sup> Ánjein añájein lubeí esériwidutiña gayúbudiritiña

afiñetiña, moún lumuti lougua lan jinében joun ladügarügü jadújeñu jamá lueígiñe Crístu. Lubáragiñe líra, lúnti jesériwiduniña buídutima, lugúndun ja erésibirubalin lubuídun jesériwidun, afiñetiña, idújeñu giñe jínsiñegutiña. Arúfudajabeí cátei le, apúrichijabeíme.

*Arúfudajani maríchatí lúma irísini inárüniti*

<sup>3</sup> Ánjein arúfudaja ában gürígia cátei maríchatí áni múaraanti lúma larúma arúfudajani le láni Wabúreme Jesucrístu le íderagubaliwa agúñfulira lúma Búngiu, <sup>4</sup> ában barügua túngua gürígia ligía, le ibídiñeti ni cáta lun. Ganígiti lasígenejan luágu buri dimúrei, lídaangiñeti asígenejani le liábin buri gimúgaü, gáñiguaü, anábajani, mafíñeni joun gürígia, <sup>5</sup> lúma buri wuríbu magúmuchaditi. Jíbiri gürígia ja, wuríbati jasáminan, ibídiñejabutiña lun inárüni, jaritaguatiña luágu lébuna lan lagáñeirun irísini agúñfuliruni lúma Búngiu. Disebá jaweí gürígia ja ítarabaña. <sup>6</sup> Inárüni luágu ában lan oúnwenbun irísini agúñfuliruni lúma Búngiu lun le gufúrumabei láu le lúmabei. <sup>7</sup> Manügúntiwa ni cáta wámagua ñájoun ubouágun, siñábei giñe wanügün ni cáta yágiñe, <sup>8</sup> ánjein geígin wabei, ganáangun, lúnti gufúruma wamá láu líra. <sup>9</sup> Ánjaña ja busénbaña jarísidun, mawándun jamúti ouchwagúni, ába jáburujan tídoun lisádaraana sarágu lagübüri ayúmajani le málati, le ásiñeragüdübei gürígia jebélurun siélun, ába jóúdin máfiougatin. <sup>10</sup> Línsiñegu seínsu ligía lílagülebei sun luwúyeri wuríbani, áni añájein sarágu gürígia ladüga jóúchun jabíjin seínsu, ába jígiruni jafíñen luágu Crístu, buíngüda jamáaliti jabágari guánarügü láu asúfuriruni.

*Wuríbu buíti le lání afíñeni*

<sup>11</sup> Anjabuti amürü, Timotéo, queísi ában ban wügürí derégeñuti lun Búngiu, anúrajabá lueí buri cátei le. Barúba ában ibágari le lánina ísuruni, le lánina gúnfuli lúma Búngiu, le lánina afíñeni, le lánina ínsiñeni, le lánina gagúraasuni lúma areíduni.

<sup>12</sup> Áfaaguabá buídu luágu lání wafíñen fuleísei, ábame bagáñeiruni ibágari le magúmuchaditi, lun líra lagúara Búngiu bun dán meja le barúfudunbalin jagíbugiñe sarágu gürígia luágu aráanseñu bíña lan lun bafálaruni Crístu. <sup>13</sup> Guetó, ligíbugiñe Búngiu le íchugubei ibágari lun sun cátei, lúma ligíbugiñe Jesucrístu, lé meja gíñe geféenbei luágu le inárünibei ligíbugiñe Pilátó, <sup>14</sup> buséntina lun bídin láu le nubeíbei bun táu sun tarúma banígi, úa lámuga cába lan uágu ladeinjouá bun, darí liábin Wabúreme Jesucrístu. <sup>15</sup> Dánme lachülürün dan ligía, le lanúadajabei Búngiu, lagíribuduba Crístu ubouágun, Búngiu rügüñein weírígu, Súnti Gabáfu, Jarúeite urúeigu, Jabúreme abúremeinigu. <sup>16</sup> Ligía rügüñein mouwedadi, le abágaridubei lídan larúgounga le ñjín lubeí mayárafadun lan ni ában. Maríjin lágili ni ában gürígia Búngiu, siñáti gíñe larijiniwa. ¡Rúalá uweíríguni lun, arúfudualá lubáfu lun sun dan! Ítaralá.

<sup>17</sup> Ja gámabaña irísini lánina ubou le, aríñagabá joun lun manáangun jamá jóungua luágu, míchugun jameíme jeménigi luágu irísini ligía, lugúndun machouúrunti, lun jíchuguni jeménigi luágu Búngiu, le wínwanbei, áni rúleí sun cátei woun gibe lun wagúndaarun luágu. <sup>18</sup> Aríñagabá joun lun jadügüni le buídubei, lun buídu lan jóuserun le

tímatimaati, lun aráanseñu jamá lun jíchuguni lúma lun jafánreinruni le jámabei. <sup>19</sup> Ítara lúba joúndaragun irisini joúngua siélu le adúrarubei lun sun dan, ítara lúba jabíjini ibágari tímatimaati le magúmuchaditi.

*Lagúmujoún dimúrei lun Timotéo tídan gárada to*

<sup>20</sup> Timotéo, toúnigibeí le íchugúbei lábugiñe baríaajan. Magáambabá dimúrei buri le lánina lisúbudin uboú, ni sigénei le lánina cátei le gíridügübei subúdi, <sup>21</sup> añájein jádaangiñe ja afálarubalin luwúyeri subúdi le, ígira jamáali jafíñen.

Biní lábu Búngiu. Ítaralá.

## **Lerérún Búngiu To Lánina Iséri Darádu New Testament in Garifuna (HO:cab:Garifuna)**

copyright © 2012 Wycliffe Bible Translators, Inc.

Language: Garifuna

Translation by: Wycliffe Bible Translators, Inc.

Garifuna [cab], Honduras

### **Copyright Information**

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Garifuna

**© 2012, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

---

PDF generated using Haiola and XeLaTeX on 11 Nov 2022 from source files  
dated 29 Jan 2022  
df8e4807-f4f9-5f4a-ab14-d1f7ffe98b0a